

wie obgesagt, also das der merertail ross gar nahe waren zu scheitern geritten, do mußte graf Frobein Cristof seiner besten pferdt eins zu Brüssel stehen lassen. Bei dem blib [1178] das alt knechtlin, der Hanns Kolb. Uf der widerfart
5 konnt dasselbig ross noch nit fortkommen, also blib das alt knechtlin zu Brüssel, bifs das ross allerdüngs geheilet. Do name in graff Wilhelm von Eberstain wider mit sich nach Deutschlandt. Es het diser Kolb, die zeit er zu Brüssell stillgelegen, neben ander zerungen etlich und zwainzig guldin
10 allain umb wein verthon, dann iede mafs fünf batzen galt. Nochdann, als er wider haim kam, beclagt er sich der niderlendischen weintheure und schwur hoch, in reute das gelt, so er umb wein hett verthon, allain der ursach, das er umb sollich gelt nie wer bezechet worden, geschweig das er weins
15 gnug uf ein mal het trinken. Als graff Fröbein Cristof gen Cöllen kam, war graf Bernhart von Eberstain ungefärllich bei zwain stunden darvor abgeraist, und wiewol im von seinem schwager, dem jüngern graf Wilhelmen von Eberstain, so domherr uf dem hohen stift daselbs, auch der ep-
20 tassin zu Sant Trivilio, war ain greffin von Lupfen, und ander grosse ehr widerfuere, in auch der curfürst von Cöln, graf Antonius von Schawenburg, als ain bekannten und sonder lieben fründ zu sich zum Brüel, alda die ordinari hofhaltung, luede, iedoch schlueg er sollichs mit besten
25 fuegen und gelegenhait ab, raisete den nechsten dem Rein- strom nach ufhin gen Menz, nachgends gen Speir. Da fande er graff Bernharten von Eberstain, auch waren etliche cur- und fürsten sampt deren stenden verordneten bottschaften alda uf der visidation des cammergerichts. So het
30 kaiser Karle graf Wilhelmen Wernher von Zimbern, den alten cammerrichter neben dem abt Gerwigken von Weingarten als commissarios dahin gesant. Aber graff Fröbin Cristof liefse sich dessen nichts irren oder ufhalten, sonder one allen verzug machte er sich von Speur wider uf die
35 rais und kam in wenig dagen darnach von den gnaden des allmechtigen glücklichen und wol wider gen Messkürch, alda er meniglichen in guter gesundthait und glücklichem zustande fande. Aber es stande über ain vierteil eins jars nit an, es fieng sich mit seinem langwirigen wethum an der
40 brust zu erzaigen, darvon hernah seltzame sachen zuer ge- dechtnus verzeichnet werden.